

Transkription von Urkunde HGW 1389a

Ort, Datierung: Greifswald, 1389-??-??

Signatur: Stadtarchiv Hansestadt Greifswald, Rep. 2 Nr. 171 [\[online\]](#)

Inhalt: Gebrüder Beeren: Quittung Ingeld

Bemerkung: Datierung: 16.07.1389

In no(min)e d(o)m(ini) amen vor allen cristenen luden de dessen breef seen edder horen leezen bekennen vn(de) bethughen wý lippold / vn(de) heyno brodere ghe heten beeren dat wý na rade vn(de) vulbord vnser neghesten vn(de) alder der ere rad vn(de) vul=/bord dar tho weren scholte hebben vorkoft vn(de) vorlaten vn(de)vorkopen vn(de) laten an desme breue den erbaren luden / her vlrik burow Raatma(n)ne vn(de) lambreght lowen borghe thome g(ri)peswolde vorstende(re)n der elenden an sunte Juryens / huse vor deme g(ri)peswoldevn(de) eren nakomelinghen veer mark yngheldes penny(n)ghe der munte de ghenghe vn(de) / gheue is enes yeweliken jares vppe sunte mertens dagh des hilghen bischopes an deme dorpe tho zansten / van deme houe dar nu ane wonet conrad bunsold vn(de) ener houe de dar tho light vn(de) al synen anderen / thobehoringhen tho nemende vn(de) thoendfande(n) vn(de) tho ewyghen tyden myt alleme reghte hoghest vn(de) sydest / an hals vn(de) hant vn(de) mit des mynnesten reghtes nuttecheyt frigh vn(de) fredeliken tho besittende also / de vorebenomeden veer mark yngheldes myt all eren thobehoringhen vns vn(de) vnsen olderen hebben tho / ghe horet . Sunder allen denst vns vn(de) vnsen eruen vn(de) nakomelinghen tho doende Vn(de) were dat de / heren des landes van den voreben(omeden) veer mark yngheldes yeneghen denest escheden edder an yenerleye / denste reght weren van zeede edder van plight den schole wý vnse eruen vn(de) nakomeninghe van vnsme / ande(re)n gude doen . Vn(de) wes wyen den veer mark yngheldes vn(de) eren thobehoringhen ghe hat hebben dat / late wý gentzliken den voreben(omeden) elenden vn(de) eren nakomelinghen vnde gheuen vn(de) laten den voreben(omeden) / elenden vn(de) eren vorestende(re)n vn(de) eren nakomelinghen vulenkomene maght de voreben(omeden) veer mark yngheldes van / deme voreben(omeden) houen vn(de) synen thobehoringhen tho pandende wanne vn(de) wo dicke en des noet is de pande / tho driuende tho borende tho vorsettende tho vorkopende edder wo en dit euenst kumpt also dat se ere / Rente gentzliken moghen hebben vn(de) boren An ene vredesamme besittinghe der voreben(omeden) veer mark yn=/gheldes vn(de) erer thobehoringhe hebbe wý de voreben(omeden) elenden ere vorstende(re) vn(de) nakomelinghe ghe wyzet vn(de) / wyzen ze dar an in desser yeghenwardighen schrift vor vertich m(a)rk pennynghen(n) der munte de thome gri=/peswolde ghenghe vn(de) gheue is de vns gantzliken ghe tellet gheuen vn(de) bereed synt vn(de) gentzliken an / vnse nut ghekeret er desse breue schreuen synt . Vortmer were ymand de de voreben(omeden) elenden ere vor=/stendere edder nakomelinghe an den voreben(omeden) veer mark yngheldes edder erer thobehoringhen be wore / hinderde edder bewore bekummerde dar schole wý ze gantzliken af vntworen vn(de) vntvryen vnder vnsme / arbeide schaden vn(de) kosten . De voreben(omeden) veer mark yngheldes myt all eren thobehoringhen scholle wý vn(de) wil=/len den voreben(omeden) elenden eren vorstende(re)n vn(de) nakomelinghen vor den vorsten des landes vorlaten vn(de) schik=/ken dat en dat van den voreben(omeden) vorsten vryngheldes ghelened werde myt der daet Na aldusdaneme redeli=/ken kope hebben de voreben(omeden) vorstendere der benomeden elenden vns vnsen eruen vn(de) nakomelinghen vul=/le maght ghe gheuen wedder tho

kopende de voreben(omeden) veer mark yngheldes vor veertigh mark penny(n)ghe / der munte de voreben(omed) is wanne wy willen des dat de wedder kop sche vppe enen sunte mertens dagh vppe / den suluen sunte mertens dagh schole wy de voreben(omeden) vertigh mark en an ener summen an reden pe(n)nynghe / bynnen der staad thome g(ri)peswolde bereden vnde betalen myt der daet vn(de) de Rente de denne vallende is vn(de) / de Rente van den ande(re)n jaren de denne [... ...] ¹ vpghebore vn(de) / de en schalme an deme houetstole nicht ap slaen edder rekenen vn(de) wan wy desse voreben(omede) Rente willen wedder / kopen dat schole wy vn(de) willen en en half jaar tho voren witlik doen . Alle desse voreschreuenen stücke vn(de) sake / hebbe wy lippold vn(de) heyno brodere ghe heten beeren voreben(omede) van vnser vnser eruen vn(de) nakomelinghe weghe(n) / myt ener zamenden hant gheredet vn(de) louet vn(de) reden vn(de) louenan desser scrift den voreben(omeden) elenden eren vor=/stende(re)n vn(de) nakomelinghen stede vast vn(de) vngheulecket tho holdende mit der daet sunder alle argelist vn(de) / vortmer wy henný(n)gh beere tho slawergh vn(de) henný(n)gh beere tho mursow van vnser vn(de) vnser erfnamen weghe(n) / hebben alle desse voreschreuenen stücke vn(de) sake ghemeghteghet vn(de) vulbordet vn(de) meghteghen vn(de) vulborden / se an desser schrift . vnde gheuen ener ghe hulpe gheestlikes reghtes vn(de) weerdlikes reghtes dar me aldusda=/ne breue mede hinderen edder breken moghte vn(de) dat reght scal vns nene wys yeghen desse breue nutte / edder hulpelik wezen . An ene hoghere bekenntnisse hebbe wy vnse ynghezeghele an dessen breef laten hen=/ghen . De gheuen vn(de) schreuen is thome gripeswolde . na ghodes boord duzend Jaar der hondert Jaar an de=/me neghene vn(de) aghtentighsten Jahre des neghesten daghes der hilghen apostel daghe alse se ghedelet / worden Tughe desser stücke vn(de) sake synt de erbaren lude her Johan low . her wolter van lubeke her / arnd van der letzenitze borghermestere thome g(ri)peswolde . her vintentius wicboldi her arndt langhe Raat=/manne dar sulues thome g(ri)peswold . vn(de) vele meer lude de louen vn(de) ere werdigh synt

¹ [...] nicht lesbar, Falte in der Urkunde